

卷二十一

經業志 農桑

卷二十二

經業志 工業

卷二十三

經業志 商業

卷二十四

經業志 林業

卷二十五

經業志 礦業

卷二十六

金石志

卷二十七

藝文志

卷二十八

古蹟志

卷二十九

土司志

卷三十

雜志 雜事

苗蠻附

南龍續志卷二十一 例目

條例

經業志 農桑

各縣或土多田少或土少田多所出者米麥菽豆包穀膏梁等項以何者為大宗或僅足本地之食或有餘可運銷別屬均細察聞自咸同亂後去省稍遠者未墾之土動數十百畝一片荒涼人甯為盜不肯開闢各縣中如有此項曠土地面若干寬在城何方務須詳細調查至提倡桑業亦為要務各縣種桑之區若干或全屬均有桑業均應載明

目錄

農業

桑葉

南龍縣修志局纂修宋紹錫撰

經業志

農桑

舊志農桑附見物產門或擇焉不精或語焉不詳今因農桑大利百業所資既裨民生尤闕國計實為當務之急允宜專載用志經業之首庶邑之人知所重視焉續農桑

農業

南龍田少山多所出者以色穀為大宗米麥次之菽豆又次之膏粱則僅見也

按吾邑農業以田少山多之故所出者自以色穀為大宗米麥菽


豆之屬次之膏粱一物多未栽植殆因非土所宜歟惟色穀雖多鄉民用以代飯時虞不足猶以收麥充之穀米雖次專供中人以上之食常有餘蓄以應境外之需求每屆青黃不接之際粵邊獠民荷擔紛至捆載而歸民間屯積居奇藉以資生者所在皆是近數年來歲比不登食物翔貴為數十年所未有人民委之以數謂咸豐辛酉壬戌荒歉今值花甲一週適當其既故有如此之現象云鄉農歸之於天謂歲之豐歉皆天為之非人力可挽也至農事之如何講求田功之如何力作均置不問長此以往吾恐穀屬無豐收之望物價鮮低落之時矣關心民食者其亦知所返乎

桑業

南籠種桑之區有二一在新寨一在陽箐種桑數萬株

按吾邑向無桑業據舊志云蠶絲非土所宜識略云興義府近則種橡養蠶有成效觀此益信惟自兵燹後民間亦知摘桑飼蠶祇以桑種不良所出繭絲無人收買業此者無利可圖遂行中止嗣因煙禁重申民間又欲業此特無人提倡終難暢興耳洎民國初奉令興辦始闢二區專事栽培以為民倡所種之桑湖桑最多頗著成效但陽管土氣不及新寨之宜漸多枯萎殊為可惜至所出蠶絲亦屬優美所冀民間聞風興起廣為培養不僅足以資生尚可藉以興利也

又按吾邑農桑之業一須改良一須普及固已彰彰明矣然要其歸則非此項人才輩出仍無振興之望有農桑之責者幸加意焉



南籠續志卷二十二例目

條例

經業志 工業

各縣工藝凡可用可食之物皆是無論大小向來出貨精良足以暢銷者共有幾種業此者歷來獲利多少現狀如何均應查明

目錄

用物

食物



南籠縣修志局纂修宋紹錫撰

經業志

工業

禮詳考工尚矣後儒寡識越復論載惟遵義府志列木工坑冶各一
門即舊志亦及窯竹各器實有惜民力慎興造之意然皆附諸物產
之列非專誌工業也今因實業振興首重工藝亟宜詳載以資提倡
焉其業類別為二曰用物曰食物續工業

用物

陶器

按陶器產北鄉花碗窯燒製各器頗為精良邑人合資開辦營業

亦已發達不知何故未久旋停殊為可惜現所出者祇係土缶之
屬貨品雖粗為鄉民必需之物鄰境各地莫不取給於此以故行
銷甚暢獲利亦優也

鐵器

按鐵器產南鄉潭罐窯所製各種器具均屬堪用出品甚富行銷
桂邊各地獲利尤優民間賴以資生者頗眾


食物

粉絲

按粉絲係用豆粉製成業此者數十家出品精良專銷桂境營業
向稱發達近年尤盛獲利之厚非他物所能及也

按掛麵係用麥粉製成業此者城鄉皆有出品雖不及關嶺馬別
橋之良因地近桂邊值亦較廉故行銷獨暢也

又按吾邑僻處邊隅民風樸陋本無工藝之可言惟所列各物由
來已久雖貨品不甚精美銷路猶能暢行者未始非民間資生之
一藝也所冀業此者不必拘守成法隨時加意改良藝愈工而利
愈溥可操左券以決之矣



南籠續志卷二十三例目

條例


經業志 商業

縣境是否商務會萃之區有無大小水道可通舟楫界臨何省交易者何省人為多該省人開有行號幾所運入者何項貨物運出者何項貨物如地方僻陋無以上大宗商業則本處商務情形大概如何亦須報告

目錄

出貨

入貨



南籠續志卷二十三

南籠縣修志局纂修宋紹錫撰

經業志

商業

昔司馬遷作史記為貨殖立傳後儒譏之遂不復載舊志貨屬僅附見物產門亦屬語焉不詳矣今值海禁大開商務最重是不可以無紀爰為專載用志經業論述農工之後亦史遷所謂農不如工工不如商之意也其業類別為二曰出貨曰入貨續商業

出貨

烟土

按烟土全境皆產祇因界臨粵西屬地坡脚居南盤江濱可通舟

緝往來交易自以粵人為多烟土一物為所重視憶自咸同而後
烟禁大弛所產甚優粵商爭購運往百色南寧等處行銷本地商
人間亦有自行運往者年計出數更僕難終三十年來市廛之間
以之致富起家頗不乏人誠出貨中惟一特品洵乎民國禁令森
嚴此物肅清商場冷落矣

硝磺

按硝磺產縣治東南境者佳前因歐戰大開需此最急粵商爭來
購辦此物遂行銷於本地商人組織興業萬昌永茂等公司
承辦採運數年之間獲利頗厚亦出貨中大宗特品不謂歐戰告
終銷路遂滯兼之山空硯老開採尤艱業此者又因之停歇矣

按水銀產濫木廠原為我屬現歸興仁前因回亂停辦近年來邑人合資組織公司名曰源隆重行開採所出甚富運往粵境行銷為現今出貨之特品也

入貨

綿紗 布疋

按昔日衣被所資專恃土製男織女紡久已著聞自洋貨進關土貨絕跡每年所入紗布最為大宗外溢金錢為數甚鉅實吾邑絕大漏卮也

熟菸 煤油

按菸油二物向不外求近來俗尚漸奢喜新厭故每年消耗斯為大宗亦吾邑一大漏卮也

雜貨

按吾邑俗語謂物為東西謂買物為買東西數百年來實難其解不意今日闐闐間陳列之物非來自東洋即來自西洋昔為方言今成讖語年計所入東西洋貨亦未易更僕數尤為吾邑之一大漏卮也

又按吾邑出貨十之一二入貨十之八九出入懸殊商業所由不振也所深望者農事改良工藝大興或可挽回於異日耳

南籠續志卷二十四例目

條例

經業志 林業

黔中素稱大箐近因斬伐日甚以致童山徧野生氣索然自宜講求培養各縣樹木以何種為最多每年可以資生者以何種為大宗如桐油茶油樟腦漆至於可資修造能運銷各地之林木境內是否尚有地方有無培養保護之法亦應詳

察

目錄

果木

材木

薪木

例目

南籠縣修志局纂修宋紹錫撰

經業志

林業

古者虞衡有志貴在專司秦漢以還遂不復紀舊志木屬附列物產門其不專重之意亦難為之諱飾矣今森林為大利之源吾邑跬步皆山尤屬利源之所在爰宜詳載著為富給之資俾邑之有志斯業者知所講求焉其業類別為三曰果木曰材木曰薪木續林業

果木

花紅

舊志云花紅即林檎之酢者

按花紅全境皆產極多色帶胭脂味尤甘美為他處所無也

麥熟李

按李當麥熟時亦熟故名全境皆產色淡綠微黃味甘而爽脆非他李所可及是為吾邑特產也

接桃

按桃以接木而生故名全境皆產外皮微白內肉深紅味尤甘美異常誠佳果也

黃果

舊志云黃果為載籍所不載

按黃果產縣治南境者佳似橙而皮不皺似橘而味微酸惟至熟時則液多甘美無異粵之新會產也

材木

桐

舊志云全郡所產之桐有四種曰梧桐青桐油桐刺桐

按桐之為用甚廣木以製器實以榨油誠厚利之植物也今縣產尚有一種曰泡桐繁殖最易成材最速者亦是良木

栗

按栗俗呼為板栗全境皆產用途甚廣不僅果實可作食品且木質健強性能耐久對於各種氣候及水分抵抗力特大最適於鐵路枕木及水中工作原料之用誠良材也

杉

按杉全境皆產而以西鄉為最多蓋杉有二種色微紫而氣香者

為赤杉堅而耐久是為上品色白而無香氣者為白杉雖堅而易朽則下品也其性不好孤立喜與眾木叢生而鬱閉其林若植於北面或東北面之山腹凹地或濕潤之深山幽谷中最為適宜其材木理通直堅軟得宜易施工作在眾材中用途尤廣誠林場中重要之植物也

梓
楸
椅

舊志云梓有三種木理白者為梓赤者為楸梓之美文者為椅按梓楸椅全境皆產用途最廣小之可作琴瑟大之可作棟樑古稱良木信然其植地隨處皆宜最易繁殖亦林場中必要之品也

薪木

按松全境皆產西北鄉最多考松飛子成林毋庸栽植比他樹成長較早易得長大之材其性能發高熱為燃料中最上品近因松脂用途益廣此又松林副產物之效用也

青桐

按青桐即橡樹全境皆產極多木理堅實燃燒力最強為薪炭所必需煎之葉可飼蠶材能作器近又以之製為橡皮供一切衣物之用其利不亦溥哉

槐

按槐全境雖產不多材質堅密不易分裂保存期久燃燒力強用作薪炭火力最旺若成巨材以為鐵路枕木堪稱上品植地除曷

濕之處皆能發育亦林場最重之植物也

林業

又按所列各木或可資生或堪大用均易繁殖且為邑產之顯著者否則木類甚多豈能盡舉哉惟冀邑之講求林業者及時培養充類推行異日道路平泰交通便利致用之溥獲利之優誠非他業所能及也

南籠續志卷二十五

經業志

礦業

殷制司貨周官非人此礦業所由昉也洎朱明以礦稅病民後世垂
為大戒故舊志雖亦載及礦物第列於物產門附諸貨屬條其意概
可知矣今因地利待闢百昌效用礦物尤富給之源允宜詳載藉事
提倡庶幾利用厚生之業盡於是歟其業類別為三曰已開曰現開
曰未開續礦業

已開

硃砂

南籠縣修志局纂修宋紹錫撰

按硃砂礦在南鄉白水海子距城四十餘里面積甚廣礦質亦佳
民國初邑人合資開辦頗著成效嗣因資本不濟停辦

磁石

按磁礦在北鄉花碗窯距城八十餘里民國三年邑人合資開辦
出品甚佳行銷亦暢嗣因辦理不善七年停辦

玻璃

按玻璃礦在北鄉籠納山距城七十餘里民國八年邑人組織公
司名曰南明前往試辦礦質甚佳出品亦良近因主持非人辦理
未善勢將停辦殊為可惜

現聞

南籠續志卷二十五例目

條例

經業志 礦業

各縣未開之礦如五金硃砂水銀及新發明之錫鑛等何地
可資開採面積若干開過之礦何年著有成效獲利若干開
者何人共歷幾年因何事閉歇現開各礦面積若干或用
土法有無新式器具營業是否發達或合資或獨力均應詳
考

目錄

已開

現開

未開

按鐵礦有二一在東鄉漆樹林距城五十餘里邑人蕭洪澤獨力開採一在南鄉羊場均距城七十餘里邑人舒永祿等合資開採均用土法開爐煨煉年可得毛鐵八九萬斤獲利二三千元已歷數年之久營業尚稱發達誠吾邑惟一礦產也

煤

按煤礦有二一在北鄉籠納寨距城七十餘里鄉民自由開採歷有年所煨為焦炭運城出售民鬻賴之一在西鄉柯花寨距城九十餘里任人採取所出甚豐惟距城過遠運費奇昂營業致未發達為可惜耳

未開

烏石

按烏石礦全境皆有而以西鄉為最佳考烏石即士敏土又名混
合泥之原質也建築必需用途甚廣中國惟廣東之花縣英德湖
北之興國大冶能產此礦此外則未之前聞今幸吾邑亦能有此
因特表而出之以俟後之有志斯業者知所取給焉

又按吾邑山脈雄厚巖壘嶙峋礦質應所在多有奈無專門家實
地勘查以致藏而不露甯非憾事今所列各礦僅就見聞所及者
試略言之敢謂礦物即盡於此哉業之者幸力圖焉可也

南籠續志卷二十六例目

條例

金石志

古代鐘鼎碑記之屬或在私家或在祠宇或在荒野須考明何年何人所造可摩搨者摩搨附寄否亦必將原文抄送

目錄

金類 城隍廟爐

石類 月幢和尚塔銘碑



南籠續志卷二十六

南籠縣志局纂修宋紹錫撰

金石志

舊志金石附古蹟門亦已考之詳矣惟自咸同而後悉燬於兵言念及茲殊深痛惜今乃擇其閱世稍久猶能倖存者如遵義府志例列為專志藉作稽古之助焉續金石

金類

城隍廟爐在東門內城隍廟

按爐在城隍廟內用之化錢時人謂為化錢爐純係鐵質乾隆六年傅維鈞鑄下如鼎上如亭重量千斤狀甚雄偉廟中有此殊壯觀也

石類

月幢和尚塔銘碑在東門外大佛寺

舊名玉泉

按碑係月幢和尚

見舊志方外傳

塔銘原在大佛寺右後

因塔圯移於寺

內康熙六年安龍鎮總兵王平撰文玉泉寺住持

門人達古等泐

石文字俱佳洵可傳也

附原文

塔銘

月幢和尚名徹字俗姓毛氏蜀重慶江津人也

康熙安龍鎮總兵

王

平京兆人

送桃令噉感而有娠誕於甲寅年七月二十日未

時自幼喜親雲

水持金剛經年十六聞楞嚴忘境不空心句忽有

悟迺於江津之

寶山寺白母薙髮而為僧未幾往重慶西湖池謁

破雪和尚次謁

歸源大師叅萬法皈一一皈何處句三年心如木石行住坐臥渾
無異念用力既久豁然貫通己丑臘叅大雪和尚進職維那庚寅
職西堂八月遂得付大法焉師賦性淳敏端身勞已律物裕人無
不高其才行而接引後學尤為委曲提撕至於對御談玄錫號賜
紫一時名公卿皆求與師善而不可得蓋不以利祿而為親踈者
歲乙巳余移鎮安龍始獲邇師乾亟欲請見適以征勦事殷未果
至丙午六月迺得旋龍隨於十月之朔恭迎師錫於安龍城東玉
泉寺每於公暇之餘時與晤言則百念冰解形神俱泰殆古語所
云與善人居如入芝蘭之室其大師之謂歟正冀其清夜一鐘昏
愚警醒不謂塵緣厭棄師遂示寂予聞報往視師則趺坐端化面
目如生而其未寂之前一日師已令侍者心休先去矣予尚未知

已遺偈脫去時康熙五年十二月念七日也因磊塔於玉泉寺之
右以垂永久凡縉俗之流聞者莫不流涕亦其德使然耳嗚呼師
今往矣豈真與形俱往乎嘗觀忠臣義士見危授命不過一念真
誠即致氣瀰宇宙矧彼見道之士超三界了萬法涉世若有跡應
物則無情者而猶為生死劫縛草木同腐歟譬之盆水映月体
相全具有時盆破水乾遂謂月俱烏有有是理哉且其徒幾數百
人而傑出者十有二人皆各開堂演教非師庭訓有方能如是耶
康熙六年四月八日其首座達古乞手為記京兆王平敬為之銘
曰師號月幢徹了名焉牟殊瑩照五十三年四喝八棒交利人天
名聞四海誰令其然戒定休蒸子肖孫賢稽首大師願力實堅跌
跏默化脫此惡纏無去無住何滅何生清光圓滿三千大千皇清

康熙六年孟夏朔八日上浣之吉嗣法門人孤燈達智等十二人
玉泉寺住持門人達古泐石

按所列二物久經劫火巍然獨存豈真神靈呵護有以致之然鳳
凰一毛麒麟一角謂非稀世之珍耶允宜保存用期不朽是所望
於後之君子也



南籠續志卷二十七例目

條例

藝文志

縣屬名人所著之書及詩文等無論刻本抄本均應訪查徵取解局如書現無存所著書名亦應報告零篇如碑記詩文刻石為名人所著者亦編訪鈔寄 婦女詩文有可採者無論專集零篇并著者姓名搜採亦如前例

目錄

郡人著述

南籠縣時事竹枝詞 十二首



南龍續志卷二十七

南龍縣修志局纂修宋紹錫撰

藝文志

舊志藝文專載著述而著述又祇列書目此方志通例也今吾邑著述無多且文之有關事實者亦已分註各門故將郡人著述書目列於前而以近作竹枝詞附於後蓋因所詠之事切中時情多格於例不能紀載爰為比事屬詞發為歌詠冀作後之續志者之一助原非有意濫及以炫己長也續藝文

郡人著述

回變紀略一卷

虎口餘生吟草一卷

貴山雜詠一卷

前清副貢生張國華撰國華著述頗富已詳舊志此為回亂流亡及主講貴山時所作也

吟香詩草一卷

前清舉人莊南華撰

庸人筆存四卷

南籠續志三十卷

民國初廣東花縣知事宋紹錫撰筆存分公牘書牘傳記詩偶類各為卷其師舉人杜樹棠為之評註續志則咸豐四年以後宣統三年以前郡事悉為補志惟輿地建置等門並及今事亦如班志地理上及禹貢張敦頤六朝事跡編類下及北宋之例也

南籠縣時事竹枝詞

又將興義改南籠永錫嘉名竟鮮終楊海郭懷仁有知金淳亦悔當年枉著守城功

按嘉慶二年苗變攻城急郡人楊文海郭懷仁等隨府經歷金淳堅守待援踰六閱月圍始解事旋平捷聞於朝改南籠府為興義府永錫嘉名以旌其功民國成立改府為縣仍復舊名郡人僉謂不合屢爭無效愚意吾邑名稱存興義不是復南籠亦非須當改作安隆方無異議蓋安隆者乃明代設所最初之名也是所望於後之賢者起而正之耳

名傳公口事離奇記否當年太息時復漢協興相對壘其間崛起維持

按民國初黔省當局利用公口籠絡人心各縣即已風行公口者
哥老會之變名也吾邑復漢公協興公同時並起權利相爭勢若
仇敵嗣又有維持公者調停其間禍機仍不可遏時予在滇聞人
稱吾黔為匪國引以為甚詎有太息而已

傳說將軍壩上來憑城狐鼠各相猜黃童白髮齊稽首霾霧漫天一
巨雷

按公口盛行民難安枕幸壩上司令官劉顯潛統兵來邑定亂解
散徒黨嚴辦渠魁閭邑人民始得重覩天日至今追思公道自在
其功實有不可沒者

四馬人民苦政苛淫威愈熾奈伊何插花地入南籠治衽席同登起

按普安屬魯土營土司所管下四馬地方人民苦其虐待屢於光宣間請歸府治無效民國成立劃定插花該處始得撥入一時歡聲動地至今猶在耳也事詳土司志

選政原來在擇尤書名紛向風中投鄉間舉罷城間舉開票得人始
宋劉

按民國初元開辦選舉吾邑為矛姪之洵當選省議會議員興義縣劉顯治當選眾議院議員各縣舉後來郡覆選故及之

三月烟花燦爛開小農生計此中來不圖民命如管草觸法無知劇
可哀

按民國二三年間烟禁森嚴小民因生計所迫無知觸犯莫不處以死刑聞當日因種烟槍決者有數十人之多嗚呼慘矣

境內忽來護國兵將軍號令亦嚴明賢勞邑宰糧秣備七覺依然慶
不驚

按民國五年帝制發生滇黔首義護國雲南挺進軍黃毓成司令
統大兵過境民心惶恐幸邑宰胡公堯年善於因應為之籌備糧
秣固不周至以故師行無阻並未擾及民間一物民甚德之

劇烟星使出英京中土官民苦送迎貧瘠如黔情可憫供張一樣重
珍烹

按民國六年英國派使會勘黔省禁烟成績省中大吏以國際關
係飭縣妥為招待庶免政體有傷不謂漢奸從中唆使故意刁難
一切供應煞費苦心送往迎來官民交困食物一節尤為難辦以
吾邑僻處邊隅究有何物堪入口耶

窮民無告劇堪傷養濟育嬰事未遑念切痾瘵賢邑宰創成樂善共登堂

按民國七年邑宰洪公寅以昔日養濟有院育嬰有堂祇因時事變遷均置未辨於是創設樂善堂以普濟窮黎民甚感之事詳建置志公所門

陂塘水勢甚汪洋濱海農田嘆久荒望濟局開施鬼斧人民從此慶箱倉

按吾邑陂塘水患由来舊矣民國八年邑人合資墾濬詳定規章呈之有司上之大府如議行從茲化海為田為萬世所利賴也事詳輿地志水道門

駐兵一旦竟譁然喪胆居民教內遷猶幸官紳能濟變彌天大禍不

綿延

按民國九年冬駐城游擊軍第六營奉令開拔回部甫出發至鐘鼓樓忽有少數亂兵譁變搶劫舖戶勢甚汹汹一時槍聲突起居民紛紛避入教堂幸官紳合力維持變兵旋散城中秩序立時恢復誠非始意之所及然亦險矣

南籠有志自漣谿

李郡守其昌

修到春潭

張郡守錫


事始齊我愧不才難繼步

任他後世誚無稽

按民國十年春邑宰洪公寅胡公堯年先後繼任會商邑人以吾邑志來自李漣谿太守創於前張春潭太守修於後至今年久未續誠恐有失舊聞加以省垣通志續修飭縣採訪具報更宜及時纂輯事屬兩全於是設局舉行委錫專任惟錫也廿年作史學業

久荒自揆難勝屢辭未獲亦惟有退盡智力以副各方諄囑之雅意而已

又按邑人所撰詩文甚多因無關事實雖佳不錄徵諸志例莫不皆然豈敢意為去取哉



南龍續志卷二十八例目

條例

古蹟志

縣屬何處有廢城廢壘城須考何年曾經設官何時作廢壘
須考何時征戰所遺某山某地有名人曾經寓居有何遺跡
著名古墓何在一并詳考


目錄

古地

御校場
涼水營

古墓

桑氏墓
忠義節烈合墓



南籠續志卷二十八

南籠縣修志局纂修宋紹錫撰

古蹟志

舊志古蹟分類紀載固已賅備矣惟古地古墓有遺漏者今得詳為補入至忠烈合墓眾意所歸蹟雖不古亦宜附及備列舊聞以資觀感焉續古蹟

古地

明御校場在城外西南隅

按御校場在城外西南隅竹林灣上南關坡旁昔明永明王駐安龍時校閱軍實於此因以得名至今父老相傳口碑不改亦南籠之一勝蹟也

明涼水營在城南二十里

按涼水營即涼水井昔明將李成爵率萬餘眾營於此以拒清兵清將率布泰線國安等由廣西泗城進攻至此成爵戰歿至今營壘雖燬基石猶存上人因以營名地稱涼水井為涼水營云

古墓

明桑氏墓在北城外大道旁

按桑氏有二墓在城北柔遠門外壽佛寺側墓碣題曰明桑氏祖宗墓攷桑氏在明宏治中世襲安隆所千戶子孫遂家焉此墓不知係何人葬何時碣石亦後人補立在昔守土者以時致祭之至今墓上土雖未圯木則久拱洵亦古矣

清忠義節烈合墓在東門外大佛寺山麓

按此墓光緒十年郡人收集同治壬戌回亂城陷殉難男女老幼
骨骸合葬而成時人稱為大墳又名萬人墳查同治元年三月二
十三日回逆陷城時男之死於忠義女之死於節烈有姓名可考
者數千餘人當時棄之郊野白骨燐燐聞者傷心過者慘目洎城
復後流亡歸集多方搜求合瘞於此嗣數年續有所得復於墓側
另立一塚並就墓前忠義祠舊址立祠祀男之忠義者至女之節
烈仍入祀節烈祠均經鄉先達禮部侍郎景其濬暨御史譚均培
先後以事聞列諸祀典惟此墓雖不古固為邦人士最慘劫最悽
愴之一事用特載入以示不磨從輿論順輿情也

附文

清忠義節烈合墓誌

同治
舉人 莊南華 郡人

光緒十年二月初吉郡人改葬壬戌殉難忠骸越八月而墓成屬
華紀事於碑伏維玉燭長調之會金甌永奠之辰孝子忠臣並
未凋松柏貞媛烈婦何殊挹模瓊瑤處順安常無足異者至若颯
迴九有霧塞三精禍起蕭牆變生肘腋掘鼠羅雀絕糧不異睢陽
拒虎進狼養惡實符諺語時窮勢迫志恥偷生室燬巢傾心甘爭
死尤宜名垂竹帛祀享粉鄒者也憶昔咸豐九年歲在己未普安
告變新城戒嚴始作亂者大坡舖回民張翎翔馬河圖也未幾陷
新城寇諸縣悉破之並力圍攻郡城當是時外賊未來內奸先伏
積薪厝火陰謀熟我危巢芟莠植木決計鋤他非種然而根株未
盡滋蔓難圖豺虎成羣猶獾尤勝孤城窮守已歷三霜乞餉請兵
未虛一日捐錢募勇戶輸釵釧之金分穀飼軍家罄斗筲之粟

騷村落賊勢鴟張窺見室家練懷虎視曠日待久薪桂米珠晝則
炊骨食人未嘗一飽夜則炮聲震地何止數驚披甲登陴望斷乞
師之眼崇丁飛檄難邀鞠旅之心遲至同治元年季春三月大帥
趙德昌來援人飢而死者已過半矣其餘苟延殘喘不任干戈猶
復振臂奮呼誓滅朝食其忠義何如耶豈知將軍驕敵戰士陰降
時有金鼎高劉開順李發貴等投賊賣城賊乘隙以先登兵棄城而疾走可憐剛強柁
腹搏不能勝老弱空拳死而猶握紅顏自縊不愧貞姑黃髮被戕
竟成嬰鬼屍填閭巷血滿溝渠無貴無賤無老無幼同為枯骨可
勝悼哉孔曰成仁孟曰取義曾曰臨大節而不可奪殆是役殉難
者之謂歟嘗考諸禮以勞報國則祀之以死勤事則祀之茲幸鄉
先達禮部侍郎景其濟御史譚均培前後恭摺題請奉旨旌卹列

諸祀典乃與宋杰劉朝鼎胡遇林高玉廷李驤李焯琳傅金銘何
大錦景其純夏從休張錫光朱訪樵李鳳鳴黃承榮周景頌滕士
鰲陳汝弼汪暎廷常永福暨閭郡人等謹卜宅兆鳩工搜羅合瘞
於東郭之陽嗚呼白骨一堆增境內山川之色黃封三錫勵天下
臣子之心吊大節於當年風淒露冷肇明禋於後世山高水長
按故城殘壘足供考據之資後人不察輒多毀廢緬懷勝蹟能不
深嘆耶至古墓馬場之側招提之右均有一塚碑碣剝蝕字跡莫
辨因未載入特附識於此

南籠續志卷二十九例目

條例

土司志 苗蠻附

縣中舊設土司所管地面若干現有存在者否存在者尚管地面若干有無龍蔭公文已廢者因何事廢於何時苗蠻獠狝之屬種類甚多縣屬共有幾種約計戶口若干或雜處漢人村寨或完全苗寨完全苗寨須查共有若干寨所占地面若干里風俗如何生計如何均應調查并照男女各一像附寄

目錄

土司 一則

苗蠻 二則



南籠續志卷二十九

南籠縣修志局纂修宋紹錫撰

土司志 苗蠻附

南籠自朱明設所滿清改流以還舊有土司已不存在洎嘉慶二年因苗變之故設土弁制諸苗惟為日未久仍復裁廢徵之舊志已詳大事紀年之內至苗類則業已專列尤為贍備無遺矣今因民國成立劃定插花土司管地得以附入以及苗民之惡俗積習俱已進化是不可以無紀爰為專志土司而以苗蠻附焉以示一視同仁之意云爾續土司

土司

普安廳屬魯土營土司舊管下四馬地方民國元年撥入府治

按下四馬者原屬普安廳為魯土營土司舊管地也面積縱廣九

十里橫廣四十里距廳甚遠

三百餘里

距府甚近

三十餘里

昔之應試納糧

赴訴者每感不便故土司得肆虐焉人民苦之久矣屢欲請歸府

轄攝於勢不敢發旋有該處貢生張學瀛王安祥等毅然倡議赴

府赴廳據請上達祇以土司勢盛未便輕舉且事關改制窒礙殊

多其議遂寢光緒三十二年興義府知府李祖章派員查勘擬如

民請以去任事不果行宣統元年該處師範生賀炳章創設初等

小學校於該處之國安場已歷三年頗著成效該土司恐文化愈

開不利於己遣人燬之民情愈憤於是該處紳耆鄒明韜等公稟

列憲臚舉該土司虐待劣蹟詳陳隸廳之害歸府之便並於國計

民生所關尤鉅又得郡紳景方鑑等力為之助始獲准如所請民

國元年知府方荃總兵祁以德率同郡紳蔣開運景宣德等親往該處會同該廳同知江良醇勘明立界編為府治西二區詎該土司又復多方運動百計阻撓竟欲推翻前議抗不劃撥尤賴吾郡官紳合力維持改土歸流撥廳入府之事始告成功然官民心力亦幾瘁矣此土司管地下四馬撥入南籠之實在情形也

苗蠻

南鄉木咱寨苗民鬥石惡俗屢經制止弗悛民國紀元自行禁絕

按苗俗舊志已詳惟木咱鬥石之事甚為離奇何未載及蓋此俗大干厲禁既不能禁而又載之殊未便也今幸民志已開此俗不禁自絕允宜補載以為苗勸木咱者邑之南鄉最大寨也寨有上下之分其俗每年自元旦起至元宵止上寨人與下寨人雖至親

密友不相往來視之若仇敵然人各以筐盛石以石互擊初則十
數人繼則數十人後則雙方各數百人擊鬥猛烈死傷甚眾往觀
者莫不竦然十六日始行罷鬥仍復相過從通慶吊如故洵異事
也歷任文武官守恐釀巨禍亦嘗示禁并派兵制止終不聽僉曰
此俗相沿已久不如此歲不登穀不熟矣縱有死傷原不究從未
以此肇訟何禁為因置之遂成此俗咸豐四年教匪再秉成涂令
恒等進攻郡城知府張鏌檄調該處數百人來城備戰守頗有功
後此愈不能禁人亦視之為固然無足怪矣洎八民國其風始息
良由該處人民讀書明理文化日開遂使數百年不改之惡俗一
旦自絕不能不為該處人民幸也故紀之

苗民俗習多與漢殊數百年來積重難返洎八民國逐漸改良

按吾邑漢苗雜居俗習大異時至今日逐漸改良以風俗言昔之服飾語言不過多學漢人今則全體變更均與漢人無異昔之婚禮新娘跌足入門新郎不與同房次日即返母家必俟三五年後方回夫宅謂之坐家以故姦殺和誘之案層見叠出今則均以漢禮新娘用彩輿往迎不坐家之陋俗亦僅有而絕無昔之少有讀書識字者今則多入學校漸出人材列仕途受軍職者更所在多有也以習慣言昔之專於力田不營別業富厚者少貧苦者多今則兼習工藝如造紙製糖之業均已著聞於時農之際亦莫不從事商賈藉以資生廣田產稱素封者雖不多覩而游手無業之徒則未之有也綜觀各情實屬進化特表出之可資策勵矣惟好訟之風不知憬悔因微物而破及家產者有之因細故而累及身

命者亦有之化導勸懲轉移其習是所望於邑之為民牧者
又按土司管地既撥人民得慶更生者無論矣至苗之與漢素相
歧視勢若吳越一有變亂苗即乘之歷史具在自非無故而然今
既遇事改良幾於同化苗不以苗自囿漢亦不以苗見待各樂其
業各安其居漢之幸尤苗之幸也

南籠續志卷三十例目

條例

雜志雜事

仙釋方技異聞軼事及一切無類可歸如有流傳可紀者一
并載入

目錄

仙釋

楊老將軍

清平和尚

伍二道人

方技

劉朝鼎

張錫三

異聞

犬異

牲變

軼事

鹿傳霖

蔡標

乩驗
二則

張之洞

南龍續志卷三十

南龍縣修志局纂修宋紹錫撰

雜志

雜事

舊志方外藝術流寓各為列傳而一切異聞則附見各門今依通例不必多列名目舉凡仙釋方技異聞軼事無類可歸者悉入雜志分別傳記所謂簡而能賅者也續雜事

仙釋

楊老將軍

楊老將軍者佚其名忘其里居不知何許人年甚耄童顏皓首飄然若仙流寓郡之北鄉花碗窻賃田而耕不置家室為人排難解紛有

雜事

朱家郭解之風人以是多附之咸豐回亂作北鄉苗多響應將軍台
集附近鄉民曉以大義動以利害示以守望相助之法製器具築砲
堡為之籌戰守者亦力而愈周鄉民悅服回逆往約舉事將軍佯允
之卒未助一兵濟一餉回逆亦無如之何乃使人奉以偽號將軍堅
不受對使者曰我老矣元帥都統之名何敢居但呼我將軍可矣於
是楊老將軍之名噪於外各方難民相率往歸將軍皆得收容撫慰
民甚德之十數年間凡經回亂之處無不大遭蹂躪獨該鄉毫無損
失當時目為世外桃源洵不誣也同治十一年大兵雲集將復郡城
將軍聞之謂眾難民曰立見太平矣汝輩速作歸計我亦須返家一
行又囑鄉民不可毀吾居荒吾田并壞吾法語甫竟遂乘馬由籠納
山巔飛馳而去後不知所終若兩人者其方山子之流亞歟

清平和尚

清平和尚蜀之峨眉僧貌奇偉年逾古稀光緒十六年來郡就梳峰山下結茅屋以居旋募修彩雲寺於其地雞鳴即起持香誦佛繞巡街市雖大雷雪不少停十數年無間日歸寺則叅坐入定不願見俗人與總兵蔣宗漢善嘗就談玄多妙解和尚諷宗漢退隱弗悟乃自斷左手封示宗漢即遠去不知所終

伍二道人

毛道人附

伍二道人蜀產游郡之北鄉上羊場主城隍廟祀年逾八十任俠精拳勇得少林宗派善騎駕馮雖馳騁巖峻間亦不蹶惟貌殊怯弱行動如不能自持者日食斗米不飽十數日不食亦不飢與人談因果能使人惡念消而善念生焉又有毛道人者居該鄉附近之龍井山

寺善導養術無烟火氣能知人休咎事出寺不開門盜不敢入則不能出云

按仙釋即舊志之方外撰志舊例必有此門今亦仍之殆與信教自由之旨有合歟

方技

劉朝鼎

劉朝鼎字梅卿郡之楊家巷人同治癸酉拔貢生精於醫為人治疾立愈不受酬性剛介或有不知妄言謝者後雖固請不往診恐玷清名人以是愈重之書法亦工不為醫名所掩年八十卒

張錫三

張錫三字晉侯郡之北街人同治生員少孤撫於伯與人言伯氏撫

孤不去口有膾力善拳術派宗少林日習八段錦至老不倦守一密
方名九宮丹主治勞傷各症兼治喉疾尤著神效惟不輕示人人亦
鮮知之有千總鄧某者遵義人患喉癰勺水不入口者數日羣醫束手
鄧亦自知不能治乃以後事託友口不能言而淚下如雨友不忍
為之遍求靈方錫三與友善聞友言心亦惻然隨往視出丹吹入喉
際頃刻霍然如常人於是錫三名大噪凡患喉疾者莫不往叩其門
錫三亦不再自秘其術矣一時治愈甚眾總兵蔣宗漢表其門年八
十猶生一子亢宗至八十六卒人以為仁術之報云

按方技即舊志之藝術而藝術又但載名醫者沿舊例也誠以醫
能生人亦能殺人其術可不重哉方今學有專門法能取締必精
其術者始得行其術庶不數貿然從事以人命為兒戲矣

異聞

犬異

咸豐九年郡民蓄犬數千頭相率出城羣聚於小西門外水桶山圓通寺側數日不散吠聲震野犬主各往喚之不歸且反噬焉時人謂為犬紮營不數月回亂即作此其先兆歟

乩驗

咸豐四年教匪冉秉成涂令恒等作亂攻城時郡人請乩判曰這劫不算劫下劫方算劫賊從雲南來那時方是劫是年城得保全至九年回亂起城即破回民先遭開廣練之慘殺漢民隨受回苗逆之荼毒其言果驗不甚異歟

又

咸豐十一年回事急圍攻郡城已歷二載城中糧盡人幾相食郡人又請乩判曰土地都成浩蕩春無花無酒過清明太平原是將軍定西出陽關無故人踰年三月二十三日城陷後人思之乩之首句蓋指當時回亂一作郡苗皆應實無一片干淨土也二句指城陷之日正清明也三句指趙德昌將軍來援致城失守蓋反證也四句指城陷時惟西路無賊難民由此逃出者皆得生也其言歷驗不爽豈乩果可憑耶噫異矣

牲變

光緒甲申之役法人寇我南藩軍事急安義鎮總兵周壽昌淮軍名將奉詔赴前敵出發前一日行祭肅禮殺雞為牲供諸案石禮未畢雞忽飛走眾軍皆驚諺曰煮熟之雞都會飛了不謂果有其事無智

愚咸知為不祥而壽昌不悟也及抵軍前壽昌為仇帥所阨因細故且受重責遂以愛憤卒於軍而南藩亦為法有果

按異聞舊志雖未專載亦曾附識各門之後今因通例備列舊聞僅擇於時局有關者略記一二以資談助此外怪異甚多豈能盡舉以為訓哉

軼事

鹿傳霖

鹿文和公傳霖字滋軒直隸定興人部勻守鹿壯節公之子前郡守張春潭公之婿也咸豐四年來郡完婚親迎禮成留署讀書題詠頗多見舊府志未幾教匪亂作逆首冉秉成涂令恒等率數萬人圍攻郡城事甚急張公告之曰我有守土責誓與城存亡即不幸全家及

難亦屬義所當然惟吾婿以壯節遺孤同罹此禍殊無謂也乃遣人取間道送之出險後官至軍機大臣武英殿大學士卒諡文恭平生事蹟國史有傳

張之洞

張文襄公之洞字香濤一字孝達直隸南皮人前郡守春潭公之第四子也年七歲隨宦來郡至十三歲始回籍應試即通顯在郡六七年間題詠甚多著述尤富詳見舊志咸豐四年匪事急春潭公誓以死殉城為存孤計乃寄公於宋紳宅內公朝夕必正衣冠迥異平日繞巡宅內不少停宋紳詰之曰亂已至此城將不保何為作此態耶公答曰城若陷吾父盡忠吾當盡孝不敢偷生惜死貽門第羞也宋紳大奇之時公方十二歲其志量即已不凡如此後官至軍機大臣

體仁閣大學士卒諡文襄平生事蹟國史有傳

蔡標

蔡提督標字錦堂黔之威甯人家貧性至孝以父客死於郡屬之威
牛謀歸葬流寓於郡時教三受廷道梗不能歸資斧告絕以至淪落
不偶嘗作吳市之乞橫逆復來且受淮陰之辱大夫不得志英雄未
過時大抵然也嗣為郡守張春潭公拔識於卒伍中後以戰功卓越
名聞海內累官至雲南提督卒於官洵為有清中興名將平生事蹟
國史有傳

按軼事即舊志之流寓今略舉數人以見吾郡雖屬邊疆曾為名
人發軔之地謂非山川靈秀是所毓鍾而必待嶽降嵩生始有申
及甫耶

又按吾續志而以流寓殿者亦如孔子刪書終及秦誓實有深意
存焉所望吾邑名世挺生人文蔚起勲業如鹿學術如張武功如
蔡著聞中外邁絕等倫豈不為志來增光哉願與邑人共勉之也

